



REPUBLIKA E KOSOVËS - REPUBLIKA KOSOVA - REPUBLIC OF KOSOVO
KËSHILLI GJYQËSOR I KOSOVËS - SUDSKI SAVET KOSOVA - KOSOVO JUDICIAL COUNCIL
PANELI ZGJEDHOR PËR ANKESA DHE PARASHTRESA
IZBORNI PANEL ZA ŽALBE I PREDSTAVKE - ELECTION COMPLAINTS AND APPEALS PANEL

ZL. Anr.44/2025

PANELI ZGJEDHOR PËR ANKESA DHE PARASHTRESA (PZAP), në panelin e përbërë nga gjyqtarët: Kujtim Pasuli kryesues, Hidajete Gashi Alaj dhe Ramush Bardiqi anëtarë, duke vendosur përkitazi me ankesën e subjektit politik Partia Demokratike e Kosovës (PDK), me seli në Prishtinë, paraqitur kundër subjektit Lëvizja Vetëvendosje (LVV), me seli në Prishtinë, për shkak të shkeljes së Kodit të Mirësjelljes për Subjektet Politike, Mbështetësit e tyre dhe Kandidatët, gjatë fushatës zgjedhore për Zgjedhjet Lokale 2025, që do të mbahen me datë 12 Tetor 2025, në seancën e panelit të mbajtur më datë 20.09.2025, merr këtë:

V E N D I M

- I. PRANOHET e bazuar ankesa e subjektit politik Partia Demokratike e Kosovës (PDK), me seli në Prishtinë, ZL.Anr.44/2025 e datës 18.09.2025.
- II. Subjektit politik Lëvizja Vetëvendosje (LVV) me seli në Prishtinë, për shkak të shkeljes së Kodit të Mirësjelljes për Subjektet Politike, Mbështetësit e tyre dhe Kandidatët, gjatë fushatës zgjedhore, Zgjedhjet Lokale 2025 që do të mbahen më datë 12 Tetor 2025, i shqiptohet dënimi më gjobë në lartësi prej 2 500 (dymijë e pesqind) euro.
- III. Detyrohet Subjekti politik Lëvizja Vetëvendosje (LVV) me seli në Prishtinë, që gjobën e shqiptuar si në pikën -II-, të dispozitivit të këtij vendimi, ta paguaj në afat prej 15 ditëve, nga dita e plotfuqishmërisë së këtij vendimi.

A r s y e t i m

Me datën 18.09.2025 PZAP-i, ka pranuar një ankesë nga subjekti politik Partia Demokratike e Kosovës (PDK) me seli në Prishtinë, në të cilën pretendohet se me datë 16 Shtator 2025, kandidati për kryetar të Mitrovicës së Jugut, nga radhet e Lëvizjes Vetëvendosje në Mitrovicë, ka identifikuar në profilin në Facebook, foto të realizuar në hapësirat e brendshme të Muzeut të Qytetit të Mitrovicës në kundërshtim me dispozitat ligjore zgjedhore, duke shfrytëzuar kështu burimet dhe institucionet publike shtetërore për qëllime elektorale.

Kandidati për kryetar Faton Peci me qëllim të përfitimit të votave shfrytëzon hapësira të institucioneve publike për të promovuar veten dhe subjektin politik LVV, ku me këtë veprim janë shkelur dispozitat ligjore të nenit 36 paragrafi 1 i LZP-së. Si provë ka bashkangjitur fotografi në link: <https://www.facebook.com/fatonpeci24>

Në përgjigjen në ankesë të datës 19.06.2025, të subjektit politik theksohet se pretendimi se kandidati për kryetar të Komunës së Mitrovicës, në cilësinë e deputetit dhe ministrit në detyrë z. Faton Peci ka shkelur nenin 36 paragrafi 1 për Zgjedhjet e Përgjithshme, nuk qëndron sepse ky nen nuk e ndalon një kandidat që mban funksion publik të marrë pjesë në aktivitete të fushatës në cilësinë e tij politike. Në këtë rast, nuk ka pasur qëllim shfrytëzimin e asnjë zyre, burim apo pasuri publike për qëllime elektorale. Aktivitetet e tij janë realizuar vetëm me resurset e subjektit politik, në përputhje me nenin 44 e vijues të Ligjit për Zgjedhjet e Përgjithshme dhe me Rregulloren Nr.07/2024.

PZAP-i, pasi që shqyrtoj dhe vlerësoi ankesën gjeti se:

Ankesa është bazuar

Paneli pasi që shqyrtoi pretendimet ankimore dhe përgjigjen në ankesë, ka gjetur se postimi i fotove është ende aktive në llogarinë në facebook të kandidatit për kryetar të Komunës së Mitrovicës nga radhët e subjektit politik LVV z. Faton Peci dhe ka vërtetuar se fushata është bërë në hapësirat e brendshme të Muzeut të Qytetit në Mitrovicë. Nga prova materiale e bashkangjitur ankesës të Subjektit Politik PDK, dhe shkresave tjera të lëndës, paneli ka vlerësuar se nga ana e kandidatit për kryetar nga radhët e subjektit politik, Lëvizja Vetëvendosje (LVV), është shkelur Rregullore Zgjedhore Nr.07/2024 për Fushatën e Zgjedhjeve, Monitorimin e Fushatës së Zgjedhjeve dhe Deklarimin Financiar, pasi që kandidati në fjalë, me qëllim të promovimit të numrit në listën me të cilën kandidon për kryetar, është regjistruar në hapësirat e brendshme të Muzeut të Qytetit, për fushatë zgjedhore, veprim ky i cili bie në kundërshtim edhe me dispozitën e nenit 36 paragrafi 1 i Ligjit NR.08/L-228, për Zgjedhjet e Përgjithshme në Republikën e Kosovës, ku parashihet se *“personi i cili mban pozitë publike i zgjedhur apo i caktuar nuk mund të përdorë atë zyre apo ndonjë nga pasurit e saj me qëllim të përfitimit të votave. Asnjë nga burimet e asnjë institucioni të administratës publike qoftë të nivelit qendror ose lokal ose edhe ndonjë ndërmarrje në zotërim ose të kontrolluar nga autoritetet qendrore ose lokale nuk mund të shfrytëzohet ose të futen në mbështetje të ndonjë subjekti politik në zgjedhje”*. E në paragrafin 3 të Kësaj dispozite përcaktohet se: *me përjashtim të rasteve të parashikuara me ligj, nuk mund të përdoren ose të vihen në mbështetje të subjekteve politike në zgjedhje, burime ose resurse të institucioneve apo organeve publike në nivel qendror ose lokal, apo çdo lloj institucioni tjetër publik*.

Sipas përgjigjes së dhënë në ankesë theksohet se kandidati për kryetar të Komunës së Mitrovicës z. Faton Peci, ka marrë pjesë në aktivitetet e fushatës vetëm si kandidat i certifikuar i subjektit politik. Mirëpo paneli vlerëson se në bazë të nenit 4 par.2 të Rregullores 7/24, përcaktohet se subjektet politike të certifikuara mund të mbajnë tubime në hapësirat publike në institucionet arsimore, sportive dhe kulturore ku nuk pengohet puna e rregulltë e tyre dhe pasi që kjo lejohet nga institucioni përkatës dhe KKZ. Çka do të thotë se fjala është për tubime ku duhen hapësirat, ndërsa nuk përfshihen Muzetë e aq më pak kur bëhet fjalë për Muzeun e Qytetit në Mitrovicë.

Sipas vlerësimit të panelit konkludohet se këto foto janë bërë në hapësirat e brendshme të Muzeut të Qytetit të Mitrovicës, dhe se këto foto gjatë fushatës zgjedhore janë bërë me qëllim të përfitimit të votave. Rrjedhimisht sipas vlerësimit të panelit veprimet e kandidatit për kryetar të Mitrovicës Jugut Faton Peci, bien ndesh me dispozitën e nenit 36 paragrafi 1 të LZP-së dhe rregullës zgjedhore 07/2024.

Paneli, me rastin e vendosjes së gjobës si në dispozitiv të këtij vendimi, ka marrë parasysh të gjitha rrethanat si në vijim: natyrën e shkeljes dhe ndikimit të mundshëm të saj në procesin zgjedhor në fjalë, shkallën dhe peshën e shkeljes. Kjo konsiston në atë se subjekti politik LVV, ka qenë i njoftuar me obligimet dhe përgjegjësitë gjatë procesit të fushatës zgjedhore. Paneli me rastin e shqiptimit të gjobës ka pasur parasysh edhe praktikën e mëhershme për rastet përafërsisht të ngjashme.

Nga arsyet e theksuara me lartë, e në kuptim të nenit 36 paragrafi 1, neni 118 paragrafi 1, neni 120 paragraf 1 nën paragrafi 1.3, të LZP-së, vendosi si në dispozitiv të këtij vendimi.

Paneli Zgjedhor për Ankesa dhe Parashtresa

ZL.Anr.44/2025 më datën 20.09.2025

Kryesues i Panelit

Kujtim Pasuli



Këshilla Juridike: Kundër këtij vendimi nuk lejohet ankesa konform nenit 118 par. 4 të LZP-së.